

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N J E
**po Prijavi koncentracije privrednog subjekta Zdravstvene ustanove - Apoteke „B
PHARM“ Novi Grad**

Sarajevo,
novembar, 2024. godine



Broj: UP-01-26-1-024-6/24
Sarajevo, 7. novembra 2024. godine

Konkurencijsko vijeće Bosne i Hercegovine, na osnovu člana 25. stav (1) tačka e), člana 42. stav (1) tačka d), a u vezi sa čl. 12., 14., 16., 17. i 18. Zakona o konkurenciji („Službeni glasnik BiH“, br. 48/05, 76/07 i 80/09), rješavajući po Prijavi namjere koncentracije privrednog subjekta Zdravstvene ustanove - Apoteke „B PHARM“ Novi Grad, Kulska obala bb, 79 220 Novi Grad, Bosna i Hercegovina, zastupanog po direktorici Dijani Petrović, Dobrljin 25, Dobrljin, 79 220 Novi Grad, Bosna i Hercegovina, zaprimljenoj dana 29. avgusta 2024. godine pod brojem: UP-01-26-1-024-1/24, na 16. (šesnaestoj) sjednici održanoj dana 7. novembra 2024. godine, je donijelo

R J E Š E N J E

1. Ocjenjuje se dopuštenom koncentracija na tržištu obavljanja apotekarske djelatnosti na području Republike Srpske i Brčko Distrikta Bosne i Hercegovine, koja će nastati stjecanjem (**) ¹ % udjela u osnovnom kapitalu privrednog subjekta Zdravstvena ustanova Apoteke „Dr GOLIC“, Ulica Zdravka Čelara 9, 78 420 Srbac, Bosna i Hercegovina, od strane privrednog subjekta Zdravstvene ustanove - Apoteke „B PHARM“ Novi Grad, Kulska obala bb, 79 220 Novi Grad, Bosna i Hercegovina.
2. Obavezuje se podnosilac prijave gospodarski subjekt Zdravstvene ustanove - Apoteke „B PHARM“ Novi Grad, Kulska obala bb, 79 220 Novi Grad, Bosna i Hercegovina, da plati administrativnu taksu u ukupnom iznosu od 5.000,00 KM (slovima: pet hiljada konvertibilnih maraka) u korist Budžeta institucija Bosne i Hercegovine.
3. Ovo Rješenje o koncentraciji se upisuje u Registar koncentracija.
4. Ovo Rješenje će biti objavljeno u „Službenom glasniku BiH“, službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće je dana 29. avgusta 2024. godine zaprimilo Prijavu namjeravane koncentracije broj: UP-01-26-1-024-1/24 u skladu sa članom 16. stav (2), a u vezi s članom 12. i 14. Zakona o konkurenciji („Službeni glasnik BiH“, br. 48/05, 76/07 i 80/09), od strane podnosioca Zdravstvene ustanove - Apoteke „B PHARM“ Novi Grad, Kulska obala bb, 79 220 Novi Grad, Bosna i Hercegovina (u daljem tekstu: B PHARM, Podnosilac prijave), zastupano po direktorici (**), o namjeri stjecanja (**) % udjela u osnovnom kapitalu privrednog subjekta Zdravstvena ustanova Apoteke „Dr GOLIC“, Ulica Zdravka Čelara 9, 78 420 Srbac, Bosna i Hercegovina (u daljem tekstu: Apoteke Dr GOLIC, Ciljno društvo).

Prijava namjere koncentracije se podnosi na osnovu (**), zaključenog između stranaka osnivača privrednog subjekta Zdravstvena ustanova Apoteke „Dr GOLIC“, Ulica Zdravka Čelara 9, 78 420 Srbac, (**) u svojstvu prenosioca udjela, Zdravstvene Ustanove Apoteke „B PHARM“ Novi Grad, zastupane

¹ Podaci predstavljaju poslovnu tajnu, u smislu člana 38. Zakona o konkurenciji.

po direktorici (**), u svojstvu Sticatelja udjela, i (**) u svojstvu davaoca saglasnosti - osnivača sticatelja. Predmet predugovora ugovora je namjera Sticatelja udjela da od prenosioca udjela kupi (**) udio u Zdravstvenoj ustanovi Apoteke Dr GOLIC.

Pravni oblik koncentracije je stjecanje (**) % udjela osnovnog kapitala jednog privrednog subjekta u drugom privrednom subjektu, u skladu s odredbama zakona koji regulišu osnivanje privrednih subjekata i njihovo upravljanje u smislu Zakona o konkurenciji i Zakona o privrednim društvima Republike Srpske ("Službeni glasnik RS" br. 127/2008, 58/2009, 100/2011, 67/2013, 100/2017, 82/2019 i 17/2023).

Uvidom u podnesenu Prijavu Konkurencijsko vijeće je utvrdilo da je ista kompletna, u smislu člana 30. Zakona o konkurenciji («Službeni glasnik BiH», br. 48/05, 76/07 i 80/09) (u daljnjem tekstu: Zakon) i čl. 9. i 11. Odluke o načinu podnošenja prijave i kriterijima za ocjenu koncentracije privrednih subjekata („Službeni glasnik BiH“, broj 30/10).

Konkurencijsko vijeće je, u skladu s članom 16. stav (4) Zakona dana 18. oktobra 2024. godine objavilo Obavještenje o dostavljenoj Prijavi broj: UP-01-26-1-024-2/24 u kojoj su objavljeni podaci o namjeravanoj koncentraciji i u kojoj su dnevnim novinama „Dnevni list“, i web stranici Konkurencijskog vijeća objavljeni podaci iz dostavljene Prijave koncentracije, te pozvalo sve zainteresovane privredne subjekte da mogu dostaviti svoje primjedbe i mišljenja. Na izdato Obavještenje Konkurencijsko vijeće nije zaprimilo komentare.

Konkurencijsko vijeće je iz Prijave utvrdilo sljedeće činjenice:

Prijava koncentracije je podnesena u zakonom propisanom roku, u smislu člana 16. stav (1) Zakona, odnosno u roku od 15 dana od dana potpisivanja Predugovora ugovora o prenosu udjela Podnosioca prijave i Ciljnog društva.

Nakon što je utvrdio da je Prijava kompletna, Konkurencijsko vijeće je izdalo Potvrdu o kompletnoj i urednoj Prijavi, u smislu člana 30. stav (3) Zakona, dana 6. oktobra 2024. godine aktom broj: UP-01-26-1-024-4/24.

1. Učesnici predmetne koncentracije

Učesnici koncentracije su podnosilac prijave privredni subjekt Apoteke „B PHARM“ Novi Grad, Kulska obala bb, 79 220 Novi Grad i ciljno društvo Zdravstvena ustanova Apoteke „Dr GOLIC“, Ulica Zdravka Čelara 9, 78 420 Srbac.

1.1. Privredni subjekt Apoteke „B PHARM“ Novi Grad (Podnosilac prijave)

Privredni subjekt Apoteke „B PHARM“ Novi Grad, registrovan pred Okružnim privrednim sudom u Prijedoru pod matičnim brojem upisa (MBS): 67-05-0006-20, sa sjedištem u ulici Kulska obala bb, 79 220 Novi Grad, Bosna i Hercegovina, zastupan po direktorici (**).

Osnovna registrovana djelatnost privrednog subjekta Apoteke „B PHARM“ Novi Grad se vodi pod šifrom djelatnosti: 47.73 Ljekarne, osnivač subjekt upisa je (**) sa (**) % udjela u osnovnom kapitalu, koji iznosi (**) KM.

B PHARM ima ukupno 63 poslovne jedinice, odnosno apoteke i ljekarske stanice. Od tog broja u Brčko Distriktu Bosne i Hercegovine se nalazi 7 poslovnih jedinica - apoteka, u gradu Banja Luka je registrovano 9 poslovnih jedinica – apoteka, a ostale se nalaze na teritoriji Republike Srpske.

B PHARM posjeduje Internet prezentaciju na adresi: <https://bpharm.rs/>.

1.2. Privredni subjekt Zdravstvena ustanova Apoteke „Dr GOLIC“ (Ciljno društvo)

Ciljno društvo Zdravstvena ustanova Apoteke „Dr GOLIC“, registriran pred Okružnim privrednim sudom u Banja Luci pod matičnim brojem upisa (MBS): 5-104-00, sa sjedištem u ulici Ulica Zdravka Čelara 9, 78 420 Srbac, Bosna i Hercegovina. Prema Izvodu iz sudskog registra osobe ovlaštene za zastupanje upisane su (**) i (**), bez ograničenja.

Osnovna registrovana djelatnost privrednog subjekta Apoteke „Dr GOLIC“ se vodi pod šifrom djelatnosti: 47.73 Apoteke, osnivač subjekt upisa je (**) sa (**) % udjela u osnovnom kapitalu, koji iznosi (**) KM.

Zdravstvena ustanova Apoteke „Dr GOLIC“ ima 7 poslovnih jedinica – apoteka, 2 u Srpcu i 5 u Banja Luci.

2. Pravni okvir ocjene koncentracije

Konkurencijsko vijeće je u provedbi postupka ocjene predmetnih koncentracija primijenilo odredbe Zakona, Odluke o utvrđivanju mjerodavnog tržišta („Službeni glasnik BiH“, br. 18/06 i 34/10), Odluke o definisanju kategorija dominantnog položaja („Službeni glasnik BiH“, broj 34/10), Odluke o načinu podnošenja prijave i kriterijima za ocjenu koncentracija privrednih subjekata („Službeni glasnik BiH“, broj 34/10), te Zakon o upravnom postupku BiH („Službeni glasnik BiH“, br. 29/02, 12/04, 88/07, 93/09, 41/13 i 53/16).

Konkurencijsko vijeće može, na osnovu člana 43. stav (7) Zakona, koristiti sudsku praksu Evropskog suda i odluke Europske komisije, kao i kriterije i standarde iz Uredbe Savjeta EK broj 139/2004 o kontroli koncentracije između privrednih subjekata, Obavještenje Evropske Komisije o konceptu koncentracija privrednih subjekata te Smjernice za ocjenu horizontalnih/vertikalnih koncentracija.

3. Pravni osnov i oblik koncentracije

Prijava namjere koncentracije je podnesena je na osnovu (**), zaključen dana (**) godine, zaključenog između stranaka osnivača privrednog subjekta Zdravstvena ustanova Apoteke „Dr GOLIC“, Ulica Zdravka Čelara 9, 78 420 Srbac, (**) u svojstvu prenosioca udjela, Zdravstvene Ustanove Apoteke „B PHARM“ Novi Grad, zastupane po direktorici (**), u svojstvu Sticaoca udjela, i (**) u svojstvu davaoca saglasnosti - osnivača sticaoca. Predmet predugovora ugovora je namjera Stjicaoca udjela da od prenosioca udjela kupi (**) udio u Zdravstvenoj ustanovi Apoteke Dr GOLIC.

Pravni oblik koncentracije je sticanje (**) % udjela osnovnog kapitala jednog privrednog subjekta u drugom privrednom subjektu, u skladu s odredbama zakona koji regulišu osnivanje privrednih subjekata i njihovo upravljanje u smislu Zakona o konkurenciji i Zakona o privrednim društvima Republike Srpske („Službeni glasnik RS“ br. 127/2008, 58/2009, 100/2011, 67/2013, 100/2017, 82/2019 I 17/2023).

Pravni oblik koncentracije, je u skladu sa članom 12. stav (1), tačka b) Zakona.

4. Relevantno tržište učesnika koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju mjerodavnog tržišta, mjerodavno tržište u geografskom smislu obuhvata cjelokupan ili dio teritorija Bosne i Hercegovine na kojem privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Uzimajući u obzir aktivnosti učesnika koncentracije, relevantno tržište proizvoda se može definisati kao tržište obavljanja apotekarske djelatnosti.

Budući da privredni subjekti učesnici koncentracije djeluju isključivo na tržištu Republike Srpske i Brčko Distrikta Bosne i Hercegovine, Konkurencijsko vijeće je kao relevantno geografsko tržište predmetne koncentracije odredio tržište Republike Srpske i Brčko Distrikta Bosne i Hercegovine.

Slijedom navedenoga relevantno tržište predmetne koncentracije je tržište obavljanja apotekarske djelatnosti na području Republike Srpske i Brčko Distrikta Bosne i Hercegovine.

5. Obaveza prijave koncentracije

U skladu s članom 14. stav (1) tačke b) Zakona, obaveza prijave koncentracije postoji kada ukupni godišnji prihodi svakog od najmanje dva privredna subjekta učesnika koncentracije ostvareni prodajom roba i /ili usluga na tržištu Bosne i Hercegovine iznose najmanje 8 miliona KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40,0%.

Ukupni godišnji prihodi privrednih subjekata učesnika koncentracije, podnosioca prijave B PHARM, i Dr GOLIĆ, za 2023. godinu kao godinu koja je prethodila koncentraciji, u skladu s članom 14. Zakona su prikazani u Tabeli 1. kako slijedi:

Tabela 1.

	B PHARM (KM)	Dr GOLIĆ (KM)
Republika Srpska i Brčko Distrikt BiH	(**)	(**)

Izvor: Prijava

Tržišni udjeli učesnika koncentracije, na dan 31.12.2023. godine, na relevantnom tržištu, kao i njihovih glavnih konkurenata, prikazano u tabeli 2:

Tabela 2.

KONKURENTI NA TRŽIŠTU	SJEDIŠTE	TRŽIŠNI UDIO U %
1. ZU "MOJA APOTEKA"	BANJA LUKA	16,24
2. ZU "CRVENA APOTEKA"	MRKONJIĆ GRAD	10,35
3. ZU - APOTEKE "B PHARM"	NOVI GRAD	9,99
4. ZU - APOTEKA "EXPERA PHARMACY"	BIJELJINA	9,95
5. ZDRAVSTVENA USTANOVA - APOTEKA "ROSIĆ"	BIJELJINA	3,81
6. ZU APOTEKA "VIVAMEDIC"	BIJELJINA	3,18
7. ZU APOTEKE "PHARMANOVA"	PRNJAVOR	2,52
8. ZU APOTEKA "LINDOS"	PRIJEDOR	2,09
9. ZU APOTEKE "DR GOLIĆ"	SRBAC	2,01

10. JZU "APOTEKA GRADIŠKA"	GRADIŠKA	2,01
11. ZU "APOTEKE-B"	TESLIĆ	1,92
OSTALI		35,93
<u>UKUPNO</u>		100
<u>Bpharm i Dr. Golić (9,99 + 2,01)</u>		12

Izvor: Prijava

Prema podacima iz Tabele 1. i Tabele 2, učenici koncentracije su ispunili uslove iz člana 14. stav (1) tačka b) Zakona, koji se odnosi na ukupni godišnji prihod na tržištu Bosne i Hercegovine, a ukupni tržišni udio istih ne prelazi 40%, obzirom da su privredni subjekti sa sjedištem u Bosni i Hercegovini, te su isti bili u obavezi podnijeti Prijavu koncentracije Konkurencijskom vijeću.

6. Analiza i ocjena koncentracije

Konkurencijsko vijeće je analizom relevantnih podataka, u smislu člana 17. Zakona, ocijenilo da provedbom predmetne koncentracije neće doći do ograničavanja ili narušavanja tržišne konkurencije.

Članom 17. Zakona o konkurenciji propisano je kako je Konkurencijsko vijeće dužno analizirati efekte koncentracije, koji za posljedicu imaju značajno narušavanje tržišne konkurencije, a naročito:

- Strukturu relevantnog tržišta,
- Efekte koncentracije na ostale stvarne i potencijalne konkurente;
- Položaj učesnika koncentracije, njihove tržišne udjele, ekonomsku i finansijsku snagu;
- Mogućnost izbora dobavljača i korisnika;
- Ekonomske, pravne i druge prepreke ulaska na tržište;
- Nivo unutrašnje i međunarodne konkurentnosti učesnika u koncentraciji;
- Trendovi ponude i potražnje relevantnih roba/ili usluga;
- Trendove tehničkog i ekonomskog razvoja;
- Interese potrošača;

Poslovne aktivnosti Podnosioca prijave, te ciljnog društva na relevantnom tržištu Bosne i Hercegovine preklapaju na tržište obavljanja apotekarske djelatnosti na području Republike Srpske i Brčko Distrikta Bosne i Hercegovine.

Učesnici koncentracije B PHARM kao sticatelj udjela, i DR GOLIC kao prenosilac udjela zaključili su (**), od dana (**).

Kako je navedeno u prijavi, kupovinom (**) % udjela u Zdravstvena ustanova Apoteka „DR GOLIC“, Zdravstvena ustanova Apoteke „B PHARM“ Novi Grad će steći (**) kontrolu nad ovim privrednim subjektom koji ima značajnu bazu kupaca i značaj potencijal za povećanje opsega prodaje. Sticanjem (**) % udjela sticatelj stiče i (**) % pravo da donosi poslovne odluke novog privrednog subjekta. Osnovni ekonomski motiv sticatelja udjela je da se kroz rast prihoda od prodaje ostvaren kupnjom ovisnog privrednog subjekta, ostvari povrat na investicije čijim će se reinvestiranjem kroz poboljšanje usluga i uslova rada povećati zadovoljstvo kako radnika tako i krajnjih kupaca i u konačnici povećati stopa dobiti na ukupan kapital.

Provedbom koncentracije doći će do povećanja tržišnog udjela i prinosa Zdravstvena ustanova Apoteke „B PHARM“ Novi Grad koji će se reinvestirati u poboljšanje ličnih dohodaka radnika i uslova rada što će povećati njihovo zadovoljstvo. Imajući u vidu da farmaceuti koji su uposleni u apotekama nisu samo prodavači proizvoda i usluga već radnici stručno osposobljeni za davanje savjeta u sferi održavanja i poboljšanja zdravlja stanovništva, ovo će se direktno odraziti i na kvalitet usluga i povećanje zadovoljstva pacijenata odnosno kupaca u apotekama.

Pored ovoga, povećanje prodaje i bolja pregovaračka pozicija privrednog društva prilikom sklapanja ugovora sa dobavljačima će se odraziti i na bolje uslove nabavke koji će dalje utjecati na smanjene cijena prodajnog asortimana.

Analizom svih raspoloživih podataka, a u smislu odredbi člana 17. Zakona, Konkurencijsko vijeće je utvrdio kako povećanje tržišnog udjela privrednog subjekta BPHARM predmetnom koncentracijom neće dovesti do sprečavanja, ograničavanja ili narušavanja tržišne konkurencije na tržištu tržište obavljanja apotekarske djelatnosti na području Republike Srpske i Brčko Distrikta Bosne i Hercegovine. Naime, privredni subjekt BPHARM na relevantnom tržištu ima tržišni udio od 9,99 %, a privredni subjekt kojeg isti preuzima ima 2,01 % tržišnog udjela, te spajanjem ova dva nezavisna privredna subjekta neće doći do prevladavajućeg utjecaja na tržištu niti bilo kakvih negativnih učinaka na isto.

Slijedom navedenog, i analizom svih dostavljenih podataka Konkurencijsko vijeće je ocijenilo kako predmetnom koncentracijom neće doći do sprječavanja, ograničavanja ili narušavanja konkurencije na tržištu, pa je stoga istu i ocijenio kao dopuštenu, u smislu člana 18. stav (2) tačka a) Zakona.

7. Administrativna taksa

Podnosilac prijave je na ovo Rješenje, u skladu sa članom 2. stav (1) tarifni broj 107. tačka d) pod 1) Odluke o visini administrativnih taksi u vezi sa procesnim radnjama pred Konkurencijskim vijećem („Službeni glasnik BiH“, br. 30/06, 18/11 i 75/18) dužan platiti administrativnu taksu u ukupnom iznosu od 5.000,00 KM u korist Budžeta institucija Bosne i Hercegovine.

8. Pouka o pravnom lijeku

Protiv ovog Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Rješenja.

Predsjednik

Ivo Jerkić

Dostaviti:

- Podnosiocu Prijave;
- u spis;